

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 24. Mäerz 2021

Här President,

sou wéi d'Chambersreglement et virgesäit, bieden ech lech, dës parlamentaresch Fro un d'Madamm Ëmweltminister weiderzeleeden.

Am Artikel "exotische Ameisen bedrohen die Artenvielfalt" deen den 23. Mäerz um däitschen Internet Zitt Spektrum.de publizéiert gouf, ass ze liesen, datt den onkontrolléierten Import vun exoteschen Déierenaarten a villen europäesche Länner eng grouss Gefor fir de Räichtum vun deenen eenheemeschen Déierenaarten duerstellt. Dës verbreedden sech net zulescht iwwert en onkontrolléierten Handel an duerch Noléissegkeet vu private Proprietären.

Duerfir hunn ech folgend Nofro un d'Madamm Ëmweltminister:

- 1) Wéi eng Douaneskontrollen si fir den Handel mat exoteschen Déieren aktuell zu Lëtzebuerg en place?
- 2) Muss virum Kaf vun engem exoteschen Déier en Noweis abruecht ginn, datt déi betreffen Déieren net aus dem geplangte Liewensraum ausbriechen an sech onkontrolléiert reproduzéiere kënnen?
- 3) Wéi eng Assurance mussen de Keefer an de Verkeefer fir de privaten Handel mat exoteschen Déierenaarten zu Lëtzebuerg ofschléissen?
- 4) Huet d'Madamm Minister Kenntnis doriwwer, wéi eng invasiv Déierenaarten aktuell zu Lëtzebuerg verbreet sinn? Kéint si eng Opstellung vun deenen eenzelen Aarten an hire Verbreedungsgebidd presentéieren?
- 5) Wéi eng Mesure sinn aktuell en place, fir d'Ausbreedung vun invasiven Aarten ze verhënneren, respektiv drop ze reagéieren?

Mat déiwem Respekt,



Fred Keup  
Deputéierten



LE GOUVERNEMENT  
DU GRAND-DUCHÉ DE LUXEMBOURG  
Ministère de l'Environnement, du Climat  
et du Développement durable

Luxembourg, le 27 avril 2021

**Service central de législation**

**Monsieur Marc Hansen**

**Ministre aux Relations avec le Parlement**

**Objet :** Question parlementaire n°3924 – Réponse

Monsieur le Ministre,

J'ai l'honneur de vous communiquer en annexe la réponse à la question parlementaire n°3924 tout en vous priant de bien vouloir en assurer la transmission à Monsieur le Président de la Chambre des Députés.

Recevez, Monsieur le Ministre, l'expression de mes sentiments distingués.

La Ministre de l'Environnement, du Climat  
et du Développement durable



Carole Dieschbourg

**Äntwert vun der Ministesch fir Ëmwelt, Klima an nohalteg Entwécklung op d'parlamentaresch Fro n°3924 vum 24. Mäerz 2021 vum éirewäertenDeputéierten Här Fred Keup iwwert exotesch Déieren an invasiv Aarten**

**1) Wéi eng Douaneskontrollen si fir den Handel mat exoteschen Déieren aktuell zu Lëtzebuerg en place?**

Generell muss ee bei „exoteschen Déieren“ verschiddenen Zorten ënnerscheeden:

- Exotesch Déieren déi fräi dierfe verkaaft a gehale ginn well se ob der positiver Lëscht vun den Hausdéiere stinn déi dierfe gehal ginn;
- Exotesch Déieren déi dierfe gehal ginn nodeems de Besëtzer dofir eng Erlaabnis krut;
- Exotesch Déieren déi duerch d'CITES-Reglementatioun geschützt sinn;
- Exotesch Déieren déi ënnert d'EU Reglementatioun falen.

All liewegt Déier wat aus engem Drëttland an d'EU importéiert soll ginn, gëtt ob sengem éischten Entrées-Punkt kontrolléiert, ob et um sanitäre Niveau kee Risiko fir d'EU duerstellt an ob et an deem Sënn déi richteg Pabeieren huet an ob et net ënnert d'EU Reglement 2014/1143 iwwert „espèces invasives“ fällt, déi net dierfen an d'EU importéiert ginn.

Als Beispill kéint een do de Findel nennen, wou Veterinaren vun der Veterinairesverwaltung (ASV) Déieren inspizéieren, déi iwwert de Loftwee an d'Land importéiert solle ginn.

Am Cargoberäich ginn Douanes-Kontrollen op Basis vun der „pre-arrival Information“ gemeet déi am Fall vun engem Flug op Lëtzebuerg virun der Landung sollt disponibel sinn. Och Stéchprouwen ginn an deem Beräich gemeet, dëst op Basis vun enger Risikoanalys vun der Fracht. Am Persouneberäich fannen d'Kontrollen stéchprouwenaarteg no der Landung statt.

**2) Muss virum Kaf vun engem exoteschen Déier en Noweis abruecht ginn, datt déi betreffen Déieren net aus dem geplangte Liewensraum ausbriechen an sech onkontrolléiert reproduzéieren kënnen?**

Den Artikel 5 vun dem Déireschutzgesetz vum 27. Juni 2018 gesäit vir, dass all Persoun déi een exotesch Déier hale wëll, dofir eng Geneemegung vum Landwirtschaftsminister brauch. Den Artikel 6 gesäit vir, dass déi néideg Infrastrukturen mussen en place sinn, fir dat concernéiert Déier kënnen ze halen. Dëst implizéiert och, dass verschidde Sécherheetsmesure mussen agehal ginn, z.B. een Terrarium mat Schlass oder een ofgetrenntene Raum fir een Ausbroch vum Déier ze verhënneren.

**3) Wéi eng Assurance mussen de Keefer an de Verkeefer fir de privaten Handel mat exoteschen Déierenaarten zu Lëtzebuerg ofschléissen?**

Eng speziell Assurance ass net virgesinn, allerdings ass zum Beispill d'Halen vun engem gëftegen Déier un d'Obligatioun gekoppelt, dass déi Persoun muss ageschriwwe sinn bei engem Dépôt fir Antivenomen (Géigegëft).

**4) Huet d'Madamm Minister Kenntnis doriwwer, wéi eng invasiv Déierenaarten aktuell zu Lëtzebuerg verbreet sinn? Kéint si eng Opstellung vun deenen eenzelen Aarten an hire Verbreedungsgebieder presentéieren?**

**5) Wéi eng Mesure sinn aktuell en place, fir d'Ausbreedung vun invasiven Aarten ze verhënneren, respektiv drop ze reagéieren?**

Zu der allgemeiner Verbreitung vun invasiven Aarten zu Lëtzebuerg an de Mesuren fir d'Ausbreedung ze verhënneren hunn ech an der Äntwert vum 5. Mäerz 2021 op d'parlamentaresch Fro n°3528 Stellung geholl. Och d'Äntwert op d'parlamentaresch Fro n°3706 vum 1. Abrëll 2021 behandelt dëst Thema. Eng Lëscht fënnt den éierewäerten Deputéierten op [www.neobiota.lu](http://www.neobiota.lu).